





Igl teater vean preschanto tier la zentrala electrica a Balamburg.



Daniel Camenisch à surdo igl cudesch da Schons agl autor Felix Benesch (da san.). FOTO RTR

Do igl signal da partenza cun blear'energeia pigl toc «Das Kraftwerk»

Agli gi d'infurmaziun da sonda passada, igls 15 da november, en s'antupadas anturn 140 parsunas an la sala polivalenta d'Andeer. La Cuminanza Culturala Val Schons (CCVS) à anvindo parsunas interessadas par sapartizipar agl teater liber «Das Kraftwerk/L'ovra electrica» a par far ancunaschientscha cun acturs, auturs ad organisaturs digl toc. Igl muzist Christian Klucker vean a direger igl cor c'acumpogna igl teater ca vean giujieu igl avust 2026 tier la zentrala electrica da Balamburg.

FRANCESCA MARK/FMR

Daple ca 190 anzunzgas veva igl comite d'organisaziun digl gioi liber survagnieu. Parsunas interessadas pigl teater «Das Kraftwerk/L'ovra electrica» savevan schon durant l'exposiziun regionala MUMA, l'antscheata da matg 2025, amplanir or egn scet par s'anzunzgear – par far lavurs da voluntari, pigl cor da project near par rolas sen tribuna. Sonda passada, suainter marendà, en tut quellas a quels vagnieus infurmos davart igl gioi liber ca vean preschanto tier la zentrala da las ovras electricas da Balamburg igl avust 2026.

Egn amprem amprender d'ancanuscher

Daniel Camenisch, igl president digl comite d'organisaziun, à mano las parsunas interessadas tras igl suaintermezgi da kickoff. Trànter oter à el fatg diferaintas intervistas sen tribuna cun las parsunas prinzipals digl gioi liber, sco par exaimpel cuagl actur professional Peter Hottinger, igl dirigent Christian Klucker ad igl autor Felix Benesch – las acturas Anita Iselin a Livia Deven earan deplorablameing absaintas. Ellas duas en oriundas digl Grischùn, abiteschan actualmeing an la Germania ad an l'Austria ad an priu sei egn video par sapreschantan an la sala polivalenta d'Andeer.

Exerzitar cun profis

Par saver fitar da scriver l'istorgia ad inventar tut las rolas, sto igl autor Felix Benesch saver quàntas parsunas ca vutan

«Jou sper ca vus vez capientscha par la mi articulaziun falada da las construcziuns rumantschas.»

Peter Hottinger, actur

anzuma giujear teater. Ascheia à la raspada da 140 parsunas sa partgieu sei an tres diferaintas grupas: igls cantadurs en ieus anzelmel cun Christian Klucker an l'aula par exerzitar la canzun «La notg ei varga» da Tumasch Doll. Ad igls futurs acturs an exerzito sura an la stánza pinta da prova egn scena anzelmel cun Felix Benesch a cun Peter Hottinger, egn actur professional.

Igl autor grischùn Felix Benesch vean a scriver egn scenari ca saspaja an

la Val Schons anturn igl on 1932. L'electricitad à anc beiga cuntanschieu la Val Schons. Igl parsura da Maton, igl signur Rudin (giujea da Peter Hottinger), vut midar quegl ad igl dat grànds discussiuns tier la populaziun. Quella scena an igls futurs acturs preparo sonda suaintermezgi durant 20 minutas. «Jou sper ca vus vez capientscha par la mi articulaziun falada da las construcziuns rumantschas», e saparstgiso igl actur da Turig. Suainter la pinta prova an igls acturs laics ad igls profis inszeno anzelmel la scena avànt igl publicum. Tut e curieu schon fetg bagn ad Andeer suainter curt tains. Igl toc vean digl rest preschanto an tres lungats – rumantsch, tudestg a taliàn.

La tearza grupa, igls gidaders voluntaris, e rastada durant las provas da cànt a teater an la sala polivalenta par sa dascuer a par s'organisar.

Provas intensivas

Mintegna a mintegn à igl davos survagnieu egn plan da prova. Davent igl marz 2026 antocen fegn da fanadur vean exerzito minga sonda a dumeingia da las 9.00 antocen las 18.00. Las davosas duas eandas da prova en lua fetg intensivas: minga gi tres uras la sera.

Par las dudesch rapreschantaziuns durant igl avust 2026 san ign schon ussa putar bigliets sen la pagina d'internet da la Cuminanza Culturala Val Schons – antocen fegn da november valan prezis redurgieus. Las preschantaziuns en mingame vendargis, sonda a dumeingia digls 6 antocen igls 23 d'avust 2026.



Anturn 140 parsunas interessadas en s'antupadas sonda a l'ocurrenza pigl gioi liber «Das Kraftwerk/L'ovra electrica».


FOTO FRANCESCA MARK



Cun musica legra à igl do sonda en cordial bagnvagnieu agl gi d'infurmaziun ad Andeer.

FOTO FRANCESCA MARK

inserat



FMR
VITAMIN R
LECTURA RUMANTSCHA